

萬有文庫

第二集七百七種


王雲五主編

惜抱軒詩文集

(三)

姚鼐著

商務印書館發行



惜軒詩文集
江苏工业学院图书馆
著 鼎 姚
藏书章

國學基本叢書

惜抱軒詩集卷一

古體五十六首

錢舜舉蕭翼賺蘭亭圖

萬壑千巖當坐起。斷取越東山百里。世閒不見永和人。長有春風流曲水。滄海日高開寺樓。樓上當窗僧白頭。越僧世得鍾張法。頭白朝朝摹禊帖。扣門客坐軒檻風。茶香酒煖笑語同。致君有道堯舜出。訪古無人羲獻空。頻說法書日西宴。蕭郎縮手心無限。老僧抵掌僧雛睨。似謂慢藏旁欲諫。語卿且勿諫。懷璧不可居。御史稱有詔。明日將登車。長安再拜陳玉除。歐虞俯首愧不如。年往運謝五百餘。錢生染筆中躊躇。石牀閉絕昭陵夜。無復人閒第一書。

元人散牧晚歸圖

日落未落東皋黃。搖風欲靜千絲楊。榆莢雨後邨塢涼。澤中艸長人微茫。牛從雜遝老特將。剌促或走或

羊望。或掉尾立銜藏莧。牛背短簍二尺強。握坐者牧舟樹檣。或來以笛吹其旁。據牛橫坐如胡牀。後有蓬髮趨踉蹌。前有招之右袂張。首伏牛後尻前昂。二人蓑薜行驅羊。掀笠偃背丫髻長。其一糾笠風中颺。林木度盡橫陂塘。前邨暝色寒蒼蒼。一人先俟牛宮旁。遶宅榆柳青蒼蒼。老翁飽腹飯黃粱。出攜幼稚嬉徜徉。少婦機杵鳴東廂。人生正可知農桑。春夏耕牧秋築場。不見臧穀羊皆亡。嗟哉此畫真吾鄉。

山寺

四山動秋響。高林黯將夕。披雲度寒榛。暮陰下前壁。寺門風蕭蕭。飛葉滿巖積。簫嶼暗深溪。淙鳴出穹石。想見谷口外。落日遠峯碧。一磬流煙中。萬壑抱檐隙。豈無湛冥人。於茲衣蘿薜。初月輝易盡。悵望遂停策。偕一青仲郢應宿登城北小山至夜作

秋聲鴻澤滿。暑氣蟲階謝。攜客眺寒原。居人斂餘稼。酒取脫枝溫。席以柔莎藉。餘照在單椒。暝色生林下。泫露亘天垂。巨壑當巖瀉。微風度灌吟。澹月流雲罅。情集交悲歡。生得幾清暇。寧於蟪蛄春。而慕燕雀夏。視後無虛鞭。規前有戒駕。懷哉古已遙。逝者今方乍。勿歎平分秋。更卜將來夜。

春雨

日暮東風休。掩卷幽窗靜。颯然春雨來。一室生微冷。時有棲鳥聲。自令虛懷警。

咏古

和璧非珠翠。流光悅婦人。章華宮畔路。夫子欲何陳。客行漢江渚。思見游女神。蘋皋風日晚。寧不怨青春。秦皇服胡越。六合歸懸衡。雄心中不繼。乃築女懷清。漢廷策賢良。褒然儒董生。慷慨公儀子。食祿復何營。如何桑與孔。賈豎充簪纓。富民封丞相。他日悔心萌。已衰不再盛。痛惜此孤惇。

鼓枻出大江。迴首樅陽渡。中有漢帝臺。言是射蛟處。日夕天風吹。青條變枯樹。上有黃鳥吟。下有寒兔顧。憶昔翠華游。帆檣隔雲霧。中流造新歌。清音發衆嫗。巡游旣已疲。神仙不可遇。爲念祈招詩。廣心焉所務。循吏有兒寬。乃以負租黜。設吏爲繭絲。何以責乾沒。念彼魏二臣。屬厭風饋畢。豈不愛吾君。懼以滋遺失。高亭發秋吹。廣野多邊聲。誰和羌笛歌。難爲愁士聽。昔應縣官募。希有絕幕名。奮隨兩校尉。西詣車師城。夷虜衆且桀。漢障懸孤旌。創夷更登陴。回首涕縱橫。累月驚弩鎧。援絕城遂傾。將軍旣效命。舊卒皆凋零。歸來室家盡。門巷荊棘平。昨聞漢天子。已拔單于庭。微功不得錄。委棄秋艸并。

贈郭昆甫煥助教

老儒閉門元向白。牢邪石邪五鹿客。寄生入盆爲竄數。衰盛人閒如反手。君才磊落天下奇。四海賢雋誰不知。五年見子銅駝陌。澹沲東風吹鬢絲。朝爲石鼓詩。暮奏鹿鳴雅。先生且臥鴻都下。絳帳譚經澹瀟灑。嗟我水車旱資舟。嗟君反衣孤白裘。三月春心寄鳴鴈。南來飛過岳陽樓。

爲王琴德題泖湖漁舍圖卽送旋里

王郎昔居泖湖裏。出戶觀漁並湖水。王郎今作漁舍圖。紙上蘆菰北風起。蘆花菰葉風蕭蕭。煙深不見垂虹橋。水澤朝飛洞庭雨。亭皋暮落吳江潮。江上漁邨帶寒巘。緩刺輕舟向平遠。波靜鳴榔月上遲。日斜挂席風吹晚。曉來網得淞江鱸。尊有清酒飯炊菰。蘆簾紙閣夜颯颯。風雨坐伴青鐙孤。就中隱約畫師意。蒼茫一葉湖山次。頗似蒲帆別岸初。迴頭恰見湖中寺。只此丹青貌故山。拂衣歸思向雲閒。秋風夜火松陵驛。唯有漁人認客還。

感春雜詠八首

晨坐執書策。惘焉思古人。勲業建九州。名德在一身。一身尙不治。九州安能仁。積水必成淵。何患賤且貧。苟非秋實堅。孰爲春木芑。客來各有勸。匪我同心親。不恤同心尠。所感餘澤淪。

新陽散餘沍。和風汎牕櫺。披褐藹自怡。舉象難爲名。坐有素琴彈。流韻方泠泠。往復動心志。終奏有希聲。其人五百年。遇我一朝并。神理不可滅。道與天地貞。使我百世下。無以移此情。

夜聞子規嘯。朝看春已晚。圓天高九重。誰令互激轉。北陸旣藏凌。西宅復寅餞。野艸青更青。衰盛吾何辨。中谷多雨寒。叢蘭蔽幽阻。託身萬物表。英華與誰睹。旣荷春陽氣。柔芳冒寸土。處有不自矜。養節故難侮。雖無桃李蹊。豈失松桂伍。葆真復其根。甘與此終古。

可憐天桃花。植彼玉階側。旖旎攬柔枝。上與綺窗直。美人出素手。日攬芳菲色。朝粧倭墮鬢。暮作金瓶飾。采采枝已空。何以成秋實。

陽澤降時雨。卉木初萋萋。黃隕豈其時。片葉飛吾階。昊天施大化。榮悴理不齊。胡爲日與人。多寡較毫釐。聖舜乃惡父。牧犢遂無妻。順命苟無忤。焉往不得諧。

橘樹多好陰。乃在湘江涯。光風蕩朝日。朱實榮綠枝。馨香旣遠達。乃託白玉墀。被遇主人盼。賓客皆嗟咨。植根諒非舊。爲枳復何悲。

昨日衆賓會。送我臨漳河。芳艸碧如染。春風吹作波。坐有兩少年。鼓瑟而商歌。一爲黃鵠曲。令我涕滂沱。

逸翮橫萬里。儔侶離別多。不如燕與雀。啁啾相鳴和。

東王禹卿病中

羣舒山色如連雲。萬里江濤蹙山動。我昔結屋山中居。歔霧蒸雲日瀕洞。青篴短棹放中流。山壑貞觀信天縱。與君初未奉餘歡。各對煙波一江共。而今俱作長安人。林麓朝辭暮羈鞅。論交塵土一茫然。回首前游渺清夢。生平素無諧俗韻。轉喉枵觸嫌譏諷。雖非鵠鼠隔雲泥。忍爲蠻觸競庸衆。君才磊砢出千尋。匠石如逢任梁棟。雕鐫緣飾會成名。枉耽清吟如鳥嘒。只今病臥況兼旬。朝夕鹽齏愁屢空。妻子牛衣色尙欣。邑人狗監文誰誦。燕山雲物萬里清。落葉秋聲一庭送。高蓋誰過敝席門。酒徒爲具新芻饔。愛君力疾劇清狂。尙有瑰詞成酒中。跌宕寧非軼世才。激昂頗負窮途慟。從來烈士志濟時。一割鋌刀貴爲用。不然脫屣去人間。肯伏光範稱鄉貢。君懷奇興逸如鴻。我逢有道慚非鳳。依違見事信爲遲。責備時賢毋乃重。何當去此脫吾累。卻因疾愈思當痛。山光水態終不殊。俗狀塵容還自恐。但須鹿門攜妻子。休俟臨邛致騎從。清暉萬里兩幽人。迴望塵埃真一閤。

奉荅朱竹君筠用前韻見贈

朱侯磊落抱奇懷。相逢意氣劇飛動。視我詩筆雜一卷。商榷古今真鑒洞。前儒瑣屑被屏棄。健筆凌空出奇縱。採玉荆山虎豹競。織綃泉室鼉鼉共。珍奇海嶽悉駢羅。累壓方艚與兼輶。況辱長篇持贈余。大鼎特陳吳壽夢。坐覺古色盈座隅。深夜秉燭耽吟諷。連年摘髭取科第。射策彤庭語驚衆。從古豪傑先輦轂。邇來冠蓋競高棟。漿酒葷肉獨鄙夷。金奏宮縣羞吟哢。首春上將西出師。蟻穴初開天宇空。美君奏賦揚馬儔。屬艸文成萬人誦。金閨頗未掩豪雄。長轡寧惟資縱送。嗟余舊業本躬稼。回首寒山餘牖鑿。欲鼠持璞真聽焚。射虎臨石枉命中。平生思就季主卜。清時焉用賈誼勸。只今潦倒愧君知。爽也雕龍具非用。憶昔譚子劉海峯。與陳伯思時余初隨計吏貢。未及相如被放歸。郊垌空望觚稜鳳。而今幸得比戶居。晨夕相從荷倚重。吾生關塞棲遲感。故人江漢飄零痛。落落獨爲燕市飲。駸駸況對殘秋恐。君方簪筆入承明。努力拾遺供侍從。予將散髮入林深。好聽砰訇泉石閔。

王君病起有詩見和因復次韻贈之。

我如惰農春未種。已失農祥土膏動。室如懸磬待遺秉。大腹便便乃空洞。由來人苦不自知。未免心侈還口縱。君方銳敏有奇懷。遠駕千古誰能共。渥洼天馬或跡弛。那邊柔心受持轡。高掌擘分二華岳。開胸吞納九雲夢。何由菖歎獨嗜余。不惜揄揚雜諷諷。心親料應塵埃稀。迹奇反致嫌猜衆。子與一病殊踈躑。惟

有擁衾看屋棟。時余獨處復誰憐。喬木虛庭響寒唳。蟋蟀俄驚旅舍秋。蟬蟪頗惻幽房空。昨君新愈幸來過。依舊雄談閒歌誦。短袖百尺光熊熊。未出霜縑目先送。千帆寒水下金陵。一鴈秋聲橫鐵轡。遠思暝浦落帆還。苦怨騷人薄寒中。舊游曾對孫登嘯。新詩欲作唐衢勸。磊落君才祇自知。支離余德彌無用。慚非大厦任幘幪。恥作小璣號游貢。神全聊當比木雞。德衰豈敢歌苞鳳。方今聖德足兼包。坐御共球湊居重。南塞宣房萬福來。北治匈奴一方痛。有道未穀奚爲恥。薄植乘時反足恐。雲霄未上且沈冥。幅巾步履鳴夷從。明朝牆角見黃花。泥酒相將一喧閤。

往與長沙郭昆甫游歷城西。見小千佛寺菊花甚盛。昨復過其處。殘菊無幾。寺僧亦亡。是時昆甫歿一年矣。適竹君又次前韻來。勉僕爲學。辭意甚美。中頗念及昆甫。竝吾鄉孫汝昂。余感其事。因更荅之。

去年重九天氣佳。城角黃花倚風動。精廬偶與故人來。卻眺晴雲出煙洞。竟填溝壑且無論。自比雲龍吐豪縱。今年重九故人死。濁酒盈尊強誰共。蕭蕭風雨動秋城。席帽短驢時獨鞚。晝陰荒寺更無人。臥地殘英杳如夢。寒蟬哀鴈共吟秋。雖有新詩向誰諷。豈期復遇翰林知。謂我才殊千百衆。投詩見和託幽思。欲候雲旗桂爲棟。居然雅樂發遺音。豈肯繁絃奏新弄。中間陳義亦何堅。列櫓巖城誰穴空。古聖垂教宏且

遠六籍具存可說誦。尙思時述蛾子勤。敢取謏聞禽犢送。法言夷棄競靡詞。如退韶虞樂秦瑟。辨麗徒於博弈賢。滑稽奚貴談言中。僕也幼志慕孔姬。禮樂崩離每長慟。博士書券終自貽。司空城旦成何用。孤吟詎比郢中歌。語人真若遼東貢。未如口吃子雲才。賦罷甘泉胸吐鳳。看君少作已絕人。艸元行使桓譚重。生世交游本寥落。況經車過感腹痛。酒鑪從此邀君醉。岐路久已深余恐。但望植學培根柢。願捧珠盤譬牛從。勿搜奇險持驚人。似向穴中爲鼠鬩。

桃核研歌爲庶子葉書山先生賦

丈人石研安得之。蒼然古色凝寒姿。開匣四坐盡驚立。縮手不敢爲摩持。黯澹凸坳水痕漬。鎮几礪礪重不陂。潤氣上結雲絲浮。晴天怒翻墨花碎。陰厓江潭湛深黑。大澤電光割夜晦。幽輝豈非玉質蘊。含芒況淬筆鋒利。昔聞漢武靈臺夜。獻桃遠致曾城駕。餘核猶含茂陵思。不獨銅人泣元霸。或言天上隕星精。下入淵谷爲玉英。千秋漱激風波爭。至今尙作濤頭形。曾爲趙宋宮中祕。上有君謨作題字。御府流傳景祐藏。夢華髣髴東京事。宣和文物太清樓。艮岳奇山錦石稠。九重博古親翰墨。焉知翫物非良謀。北風塵冥青城路。舊物飄零竟何處。清燕當時御至尊。丹鉛此日供儒素。橐筆朝成奇木對。屬車暮奏長楊賦。文章猶壯身衰老。金石無情世今故。龍溪流水萬竿竹。無數秋山點紅樹。丈人雅意慕投簪。他日煙霞墨池吐。

讀史

古來江海人。抗懷天下事。閱歷多激情。沈冥有餘志。賈生洛陽子。梅福抱關吏。流涕復上書。言之豈不義。賢者與道隆。儒林惡言肆。願從君子游。寡學當默識。

詠史

白日黯澹明河光。駢駢駟馬驅王良。萬廡天庫開天倉。北斗何爲挹酒漿。市樓炯照旗亭張。磊落錢室金爲堂。西園車馬趨道旁。詔版朝裁授使者。明日司徒拜階下。後車鮐鮑前建旄。擊鐘列鼎朱門高。室中何物灑屑刀。君不見。夏王初定九州貢。茅茨已遠螭珠用。傾宮璇室後王多。筐篋司農愁屢空。一任臨民責繭絲。安知長國傾梁棟。匹縑持出別宮門。滿堂金玉還飢凍。方知洛誥享多儀。發粟當年有餘痛。

臨清雨夜

昔挂輕帆濟江澤。載酒同舟盡佳客。兩岸秋聲楓樹青。半夜月明江水白。飄零朋舊感平生。搖落關河復今夕。漳水東流汶水清。寒雨孤篷百憂積。

酬胡君業宏

我如游雲出廬霍。千里飄飄向京洛。黃山西畔初別君。溪流飲馬桃花落。江南花落幾春風。羈思漁陽飛寒鴻。今年乘舟玩海月。片帆淮甸搖晴空。西尋廬阜彭蠡側。拂袖千峯萬峯碧。仙人一去白雲秋。明月無心照石壁。遠公東林寺。徐孺南昌宅。寒艸蒼烟昏似積。我對青天空太息。丹楓十月凋南州。雨聲寒抱章江樓。登高把酒忽相遇。昔君頗料如今不。明月寒胎耀當代。楚望沈淪媚幽彩。人閒得失似浮雲。且對江山吾輩在。清詩一唱碧霄閒。五色餘霞散湖海。湖海西風萬里吹。酒闌明日各天涯。青山挂席余將去。嗟爾塵埃玉樹姿。

望廬山

我行昨出廬山西。藤竹蒼蒼陰虎溪。東林鐘聲晚出寺。高巖木葉秋平溪。白雲萬疊倏然合。窈眇迴聽清蟻嘯。洪州三月憶愔愔。徑駕歸艇輕於鷺。宮亭湖東日初出。嵐彩欲見一片青。煙迷滄洲淼漭萬餘里。巖風忽落聞天雞。屏風疊開張。浸入青頗黎。滄海貫石梁。白日挂丹梯。松杉上接瀑布落。藤蘿下拂雲光低。須臾湖波興。日晦風淒淒。岩峯香鑪峯。搖曳同菰稗。舟行望遠勢還出。矯如踏雲浮動之蒼霓。山搖海蕩

不知處。想見枕石醉臥人如泥。晚泊湖心照南斗。仰視正與石門齊。莫言靈境近咫尺。帆檣倏過難攀躋。將游天地之一氣。廬山從我到處如提攜。

漫詠三首

周道既已敝。儒術猶未淪。暴君方代作。孟子戒思申。得國容有之。天下必以仁。秦法本商鞅。日以虜使民。竟能一四海。詩書厝爲薪。發難以剷除。藉始項與陳。刀筆吏相漢。法令惟所遵。王霸雜用之。叔孫爲聖人。盛衰益隆汙。治道何由醇。焉知百世後。不有甚於秦。天道且日變。民生彌苦辛。所以佛法來。賢知皆委身。超然思世外。聞見同泯泯。

立人通天地。斯足爲大儒。多聞闕其疑。慎言而非迂。兩漢承學者。章句一何拘。硜硜誠小哉。賢彼不學徒。奈何魏晉閒。放棄以恣踰。覲然無汗顏。誕說作僞書。子邕及士安。同敝無賢愚。淵彌雖未來。人心喪已夫。不學殖將落。周亂不斯須。所以禁言僞。宜爲治君誅。述茲誠當來。慎以防厥初。子長千古士。被難身何窮。悲哉百年後。毀譽猶不公。孔子錄小雅。怨誹君子風。美善而刺惡。史筆非不忠。文園爲令客。竊資自臨邛。將死勸封禪。佞諛以爲工。文章兩司馬。擅爲西漢雄。人君取士節。優劣安得同。如何永平詔。抑揚恣其胸。宜乎朝廷士。進者多容容。所以歌五噫。邈然逝梁鴻。

秦帝卷衣曲

池水生青蒲。枝葉自相扶。水綠平如故。池上蒲成樹。秦關百二氏王才。麾劍風雲萬里來。圖籍河西收四郡。旌旗鄴下宴三臺。燕姬趙女顏如玉。輦入殺函貯金屋。閣道春游度渭南。珠簾暮卷臨灃曲。貴主還留鉅鹿名。小腰絕愛鮮卑束。去國嬋娟意可憐。新恩慰藉情難足。別有春風飄綺羅。華鎧斗帳夜煙和。君王欲卷衣裳贈。一片流雲柰曉何。雄略英姿冠當代。指麾旦夕收江外。戎國分居大荔城。降夷盡保長榆塞。大度何嘗愧帝王。驕心豈免成傷敗。卷衣空憶可憐宵。月底花枝煙柳條。婕妤從招秦苑鴈。侍中曾插漢宮貂。錦袍再賜無顏色。笑殺河東金步搖。當年力戰壺關闢。雀來燕室誠何益。女戎亡國志先荒。邨係南朝謝安石。千秋編簡載功名。一朝富貴埋荊棘。青蒲零落水東流。不見霓旌下枋頭。碧雲散盡梧桐影。太息阿房幾度秋。

唐伯虎匡廬瀑布圖

江南萬重山。匡廬乃出萬重上。人言秋晴萬里峩峩巔。青天一點東南望。連峯蒼蒼不見頂。日出彩煙生半嶺。玉堂石室藏其中。縱有天風吹不冷。羣巖環峙不可名。巖端霞氣升空行。石梁忽貫青霞落。倒海流

雲走空壑。萬谷鈞天。廣樂鳴。思鳥哀媛。一時作。石門百仞。當空開。吳越江帆。千里來。仰首見吳越。俯首聞風雷。何人攜杖。凌倒景。蕭條六合。誰友哉。林岑藤蔦。相撐拒。驂鸞過處。原無路。世閒惟有銀河。數派通。濺珠飛玉。流平處。我昨乘小艇。正出宮亭湖。湖心黯黯。沈黛色。夕陽一半。開孤蒲。是時初冬。水不落。懸知崆峒巨壑。轟千車。傾崖曲。喘天長雨。山鬼幽篁。人見無咫尺。未登疑有命。評畫看山。定誰勝。煙雲絕境。自人閒。文采風流。隔嘉靖。流落常年。惜異才。江山尺絹。今殘剩。人生衰老。來無時。五嶽求仙。莫辭叟。

雨霽

高齋過暑雨。白雲逝滄洲。涼風起林杪。一葉已先秋。落照耿空開。倏與蒼煙收。西山轉斜漢。龍角相隨流。朝晡不相知。逝者焉能留。今之隱几者。未審當奚遊。

田家

昨宵雨未足。劬畦俟南塘。果聞北山雪。檐溜夜已長。開門陰正重。匝地垂千楊。朝日尙未升。風條自輕颺。環村水盡白。丹杏獨含光。荷鋤向隴上。但聞土膏香。鄰里盡言好。吾欲良亦償。勤劬待一飽。四體誠安康。相與不相負。莫若種稻粱。

詠七國

孔道窮獲麟。風雅泯無正。蚩蚩六國主。蟲豸力爭競。函關向東啓。四海一朝定。銅柱絀燕謀。天笑愛秦政。屈子放湘流。信陵罷稱病。傷哉鄭國渠。延韓數年命。當時天下士。寧蹈東海壘。松柏與房陵。哀歌不堪聽。

寄友

一室聞秋鴈。倏有江海思。空水澹寒天。遙待孤帆至。念君朝未來。誰當共吾逝。相望隔清溪。西風滿林次。出獨山湖至江口作

初日澄前陂。餘陰澹巖曲。清流杳終古。宛此媚幽獨。煙消淨衰艸。風來振疏木。移舟度雲影。停橈玩空淥。理昧後人踪。興與前游屬。託世楚雲裏。孤懷亮自足。

連日清齋寫佛經偶作數句

結髮慕勝因。而復役人事。秋空泝江水。勝地雲帆至。煙際東林鐘。月出山谷寺。蜩鳥諸天外。中宵倚寒被。